

# Službeni glasnik BiH, broj 53/16

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 32. sjednici Predstavničkog doma, održanoj 27. juna 2016. godine, i na 21. sjednici Doma naroda, održanoj 14. jula 2016. godine, usvojila je

## ZAKON

### O IZMJENAMA I DOPUNAMA ZAKONA O UPRAVNOM POSTUPKU

#### Član 1.

U Zakonu o upravnom postupku ("Službeni glasnik BiH", br. 29/02, 12/04, 88/07, 93/09 i 41/13) iza člana 19. dodaje se novi član 19a., koji glasi:

"Član 19a.

#### 20. Upravna stvar

(1) Upravna stvar je svaka stvar u kojoj javnopravni organ u upravnom postupku odlučuje o pravu, obavezi ili pravnom interesu stranke neposredno primjenjujući zakone, druge propise i opće akte kojima se uređuje odgovarajuća upravna oblast.

(2) Izuzetno od odredbe stava (1) ovog člana, upravna stvar je ona stvar koja je nekim zakonom izričito određena kao takva."

#### Član 2.

U članu 78. stav (2) mijenja se i glasi:

"(2) Ako je prebivalište ili mjesto boravka lica kojem se dostavljanje ima izvršiti nepoznato ili ako dostavljač utvrdi da lice kojem se pismeno ima dostaviti ne stanuje na adresi na kojoj se dostava pokušava obaviti ili ako je utvrđeno da lice kome se dostava ima obaviti ne stanuje na adresi svog posljednjeg poznatog boravišta ili prebivališta, a njegovo sadašnje boravište ili radno mjesto dostavljač ne može utvrditi, organ koji je izdao pismeno javno će pozvati stranku da preuzme pismeno putem objavljivanja poziva na svojoj oglasnoj ploči i službenoj internetskoj stranici institucije, a kada je riječ o pismenu koje se dostavlja u skladu s članom 76. ovog zakona, poziv će se objaviti na oglasnoj ploči i službenoj internetskoj stranici institucije."

Iza stava (2) dodaje se novi stav (3) koji glasi:

"(3) Dostavljanje se smatra izvršenim po isteku osam dana od dana objavljivanja pismena na oglasnoj ploči i službenoj internetskoj stranici institucije."

### **Član 3.**

U članu 116. iza stava (2) dodaju se novi st. (3) i (4) koji glase:

"(3) Ako organ utvrdi da je stranka podnijela zahtjev koji se zasniva na istom pravnom i istom ili sličnom činjeničnom osnovu povodom kojeg je postupak po zahtjevu iste stranke u toku pred tim organom ili po čijem zahtjevu je ranije riješeno, upravni organ će zaključkom odbaciti zahtjev.

(4) Protiv zaključka iz stava (3) ovog člana dopuštena je posebna žalba."

### **Član 4.**

U članu 209. iza stava (3) dodaje se novi stav (4) koji glasi:

"(4) Izuzetno od odredbe stava (3) ovog člana, nije dozvoljena posebna žalba na zaključak o ispravci rješenja koji je donio drugostepeni organ, s tim da nezadovoljna stranka može ovakav zaključak pobijati u upravnom sporu."

### **Član 5.**

U članu 235. iza stava (2) dodaje se novi stav (3) koji glasi:

"(3) Postupak po žalbi obustavlja se zaključkom ako do donošenja rješenja po žalbi prvostepeni organ dostavi dokaz drugostepenom organu da je postupio po zahtjevu stranke."

### **Član 6.**

U članu 253. stav (1) riječi: "Ako nema drugostepenog organa, rješenje može poništiti ili ukinuti Vijeće ministara" brišu se.

### **Član 7.**

U članu 255. stav (2) iza riječi: "drugostepeni organ" interpunkcijski znak "," mijenja se interpunkcijskim znakom ". ", a ostatak teksta se briše.

### **Član 8.**

U članu 257. stav (3) iza riječi "organ" interpunkcijski znak "," mijenja se interpunkcijskim znakom ".", a riječi: "a ako drugostepenog organa nema - odgovarajući organ iz stava (1) člana 253. ovog zakona." brišu se.

### **Član 9.**

Ovaj zakon stupa na snagu osmog dana od dana objavljivanja u "Službenom glasniku BiH".

Sarajevo  
Predsjedavajući  
Predstavničkog doma  
Parlamentarne skupštine BiH  
**Mladen Bosić**, s. r.

Predsjedavajući  
Doma naroda  
Parlamentarne skupštine BiH  
**Safet Softić**, s. r.